

四庫全書

子部

欽定四庫全書

子部

山堂肆考卷一百七十九

八十八

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣葉蘭

謄錄監生臣張護

欽定四庫全書

山堂肆考卷一百七十九

明 彭大翼 撰

器用

劔

管子曰昔葛盧之山發而出金蚩尤受而制之以為
一劔鎧此劔之始也周官桃氏為劔劔口謂之鐔鼻謂
之鼻鞘謂之室鞘謂之衣釋名劔檢也所以防檢非
常也

楚鐵

史記秦昭王臨朝嘆息范雎請罪王曰吾聞楚之鐵劍利而倡優拙鐵劍利則士勇倡優拙則慮遠以遠慮御勇士恐楚之圖秦也

齊金

國語齊桓公問管仲曰齊國寡甲兵奈何對曰小罪謫以金美金以鑄劍戟試諸狗馬惡金以鑄鋤夷試諸土壤甲兵大足

湛盧獻吳

趙睦吳越春秋越王允常聘歐冶子作名劍五枚取豪
曹巨闕魚腸示秦客薛燭燭曰皆非寶劍也取純鉤示
之燭矍然曰恍恍乎如屈陽之華沉沉乎如芙蓉始生
于湖觀其文如列星之行天觀其光如水波之溢塘此
純鉤也王曰客有以鄉三駿馬千匹千戶之都二賈此
劍可乎燭曰不可臣聞初造此劍赤堇之山破而出錫
若耶之谿涸而出銅雨師灑塵雷公鼓橐天帝裝炭太

乙下觀又示之湛盧燭曰善哉銜金鐵之英吐銀錫之
精寄氣託靈有遊出之神服此劍可以折衝伐敵人君
有逆謀則去之他國允常乃以湛盧獻吳吳公子光弑
吳王僚湛盧去如楚昭王得而寶之召風胡子問曰此
劍直幾何對曰赤堇之山已合若耶之谿深而不測羣
神上天歐冶已死雖傾城量金珠玉滿河不借一觀况
駿馬千戶之都乎

太阿麾晉

越絕書楚王使風胡子之吳見干將越見歐冶子使作
鐵劍歐冶子將鑿茨山洩其溪取其鐵英為劍三枚一
曰龍泉二曰太阿三曰工市晉鄭聞此三劍求之不得
乃興師圍楚城楚王引太阿劍登城麾之三軍破敗士
卒迷惑流血千里晉鄭之頭畢白

投嶽

刀劍錄周昭王持五劍以投五嶽

藏山

列仙傳干將莫耶作二劍以雌獻君留其雄者謂其妻
曰吾藏劍在南山之陰北山之陽松生石上劍在其中
君若覺殺我爾生男可以告之

干將鏌鋁

吳越春秋干將吳人與歐冶子同師吳王闔閭使造劍
干將造劍未成乃曰昔吾師之作冶也金鐵之類不消
夫妻俱入冶爐之中干將妻莫耶曰先師親鑠身以成
物妾何難也于是干將夫妻斷髮剪指投之爐中使童

女三百鼓橐裝炭金鐵乃濡遂以成劍陽曰干將而作
龜文陰曰莫耶而作縵理干將匿其陽出其陰以獻闔
閭

白虹紫電

古今注吳大帝有寶劍六曰白虹紫電辟邪流星青冥
百里皆陸斷馬牛水擊鴻鴈當敵則斬于甲盾此天下
名器也

擊柱

漢高祖悉去秦儀法為簡易羣臣飲酒爭功醉或妄呼
殿上拔劍擊柱上患之

駭鑪

魏文帝典論余好擊劍善以短乘長選茲良金命彼國
工精而鍊之至於百辟其始成也五色駭鑪巨橐自鼓
躍空

列子曰蘭子以技干宋元君弄七劍迭而躍之五劍常
在空

應氣

拾遺記越王勾踐以白牛白馬祝崑吾山神以成八劔
應八方之氣一名掩日以之指日日光晝暗二曰斷水
畫水開即不合三曰轉鬼指月蟾兔為倒轉四曰懸剪
飛鳥觸其刃如斬截焉五曰驚鯢以之沉海鯨鯢深入
六曰滅鬼挾以夜行不遇魑魅七曰却邪鬼魅見之則
止八曰真剛切玉斷金如削土木

虹蔚波映

魏都賦劒則流彩之珍素質之寶虹蔚波映龜文龍藻
服之可以威百蠻指麾可以開昏擾

電閃霜凝

宋劉子翬招劒文略曰五山之精六氣之英鍊為神器
電閃霜凝此非所謂干將莫耶者乎是劒也苟得其時
使劉季用之必揮拂白蛇之卧使朱雲請之必齟齬佞
臣之頸付之荆楚之客必喋血虜庭加之晉鄭之敵必
三軍白首必不為屬鏹以害忠良必不為含光以夸幻

惑必不銘金字以識奸雄必不飾文犀以資玩好必不
潛于魚腹以逞窟室之凶必不舞于鴻門以快沐猴之
怒

莒子試人

左昭二十三年莒子庚輿虐而好劍苟鑄劍必試諸人
國人患之又將叛齊烏存帥國人以逐之

光武賜士

東觀漢記世祖時異國有獻名馬者日行千里又進寶

劍價直百金詔以馬駕鼓車劍賜騎士按鼓車載鼓之車也天子鹵簿中有記里鼓車

代形

神仙傳真人去世多以劍代形五百年後劍亦靈化

照膽

陶弘景刀劍錄太甲以甲子歲鑄一劍名曰定光武丁以戊午歲鑄一劍名曰照膽

解獻漁父

呂氏春秋伍員逃楚楚追之急至江上見一丈人刺小船方將漁從之求涉焉丈人刺船渡之已絕江問其名族不告員解劍以與之曰此劍有七星北斗文千金劍也願獻之丈人丈人曰荊國之法得伍員者爵執珪祿萬石金千鎰豈直千金劍乎卒不受

請斬佞臣

見納諫

似流星

魏文帝典論魏太子丕造百辟寶劍長四尺二寸重一斤十有五兩淬以清漳礪之礪磻飾以文玉表以通犀光似流星名曰飛景按礪磻青礪石也

象閏月

梁武帝命陶弘景鑄劍十三口以象閏月

蕭何上殿

漢高祖六年詔定元功位次賜丞相蕭何帶劍履上殿入朝不趨按古者跣襪上殿朝覲今賜何履上殿盖優

之也

梁冀入省

東漢書梁冀帶劔入省尚書張陵呵叱令出冀跪謝陵
陵不應因劾奏之詔以一歲俸贖罪

賜馮

東觀漢記建武二年遣馮異西擊赤眉于關中上自河
南賜異乘輿七尺玉貝劔

賞魏

張瑩漢南記魏應字尹伯任城人明魯詩章帝重之數
進見論難于前特受賞賜劔玦衣服也

擊市

尉繚子曰一賊挾劔擊于市萬人無不觸辟者臣以為非
一人獨勇一市萬人皆不肖也

倚戶

淮南子曰萬畢術拔劔倚戶兒不夜驚

畫影

拾遺記顓頊高陽氏有畫影劍騰空劍若四方有兵此
劍則飛指其方故戰則克未用時在匣中常如龍虎吟
步光

曹植七啓步光之劍華藻繁縟綴以驪龍之珠錯以荆
山之玉

刃如霜雪

西京雜記高祖斬蛇劍以七彩九華玉為飾五色琉璃
為匣刃上常如霜雪光景照外開囊拔鞘輒有風氣射

人

文記星辰

刀劍錄夏禹字高密以庚戌年鑄一劍藏之會稽秦望山上刻二十八宿面背有文面記星辰背記山水

劍有帝名

刀劍錄漢平帝掘得一劍上有帝名故佩之按平帝名

衍

劍有帝字

刀劍錄魏武帝嘗于谷中得一劍刻有金字銘曰孟德王常服之

劍賜周瑜

吳孫權赤烏中有人得韓信劍帝以賜瑜

劍遺張軌

晉書張軌鎮涼州遣主簿令狐亞聘南陽王模模甚悅遺軌以帝所賜劍謂軌曰自隴以西征伐割斷悉心相委如此劍矣

挂于墓上

見墳墓

停在空中

世說王子喬戰國時人墓在京陵有盜發之都無所見
唯有一劍停在空中欲進取之劍作龍吟虎吼竟飛上
天

越女擊猿

吳越春秋越王問范蠡手劍之術蠡曰臣聞趙有處女

出于南林之中願王請問之王乃請女女將北見王道
逢老人自稱獠公公問女曰聞子善為劍願一觀之女
曰妾不敢有隱也惟公所試公即拔林杪之竹似桔槔
末折墜地女乃取其末索公操其本而刺女女因舉杖
擊之公即飛上樹變為白猿女去見越王王命五校之
高才習之當此之時人皆稱越女劍

雷公逐蛇

廣異記唐開元末武勝之靜江軍忽見灘中雷公踐微

雲逐一小黃蛇盤繞灘上靜江之人戲以石投之中蛇
鏗然作金聲雷公乃飛去使人往視得一銅劍有文曰
許旌陽斬蛇第三劍云

黑烟屬天

玉塵錄唐成都朱善存家世寶一劍劍每生神芝則天
下晏清如安史黃巢之亂劍生黑烟屬天不差毫髮

黑氣著地

酉陽雜俎鄭雲達少時得一劍鱗缺星鐔有時而吼常

在庄居晴日藉膝玩之忽有一人從庭樹宰然而下紫
衣朱紉髮露劒而立黑氣周身狀如重霧鄭素有膽氣
佯若不見其人因言我上界人知公有異劒願借一觀
鄭謂曰此凡鐵爾不堪君玩上界豈藉此乎其人求之
不已鄭伺便良久疾起斫之不中忽墮黑氣著地數日
方散

蜺氣

亢倉子曰蜚景之劒威奪白日氣成紫蜺以之刈獲則

與厥刃也無擇又越絕書太阿之劍其色如秋水

火精

杜陽編德宗將幸奉天自携火精劍出內殿因嘆曰千
萬年社稷豈為狗鼠所竊耶遂以劍斫檻上鐵狻猊應
手而碎上曰吾碎小寇如狻猊不足憂也及乘輿遇夜
侍從皆見上仗數尺光明即火精劍也

切玉

見刀

荆鍾

說苑千將莫耶荆鍾不錚以之攝履不如兩錢之錐也
道人賣劍

張良事漢知韓信有將佐才假作道人賣劍時信在楚
王揮下信見良問曰此劍何名良曰一曰將軍劍二曰
諸侯劍三曰天子劍君若用此必霸諸侯信留良宿與
之叙事良因說信歸漢信從之

童子獻劍

晉書前趙劉曜自以形質異衆恐不容于俗隱迹管涔山以琴書為事常夜閒居二童子入跪曰管涔王使小臣奉謁趙皇帝獻劔一口置前再拜而去以燭視之劔長二尺光澤非常赤玉為飾背有銘曰神劔服御可除衆毒曜遂服之劔隨四時而變為五色

搢具

漢書暴勝之為直指使者巡郡國素聞雋不疑賢至渤海遣吏請與相見不疑冠進賢冠帶搢具劔盛服至門

上謁應劭注云搢具木標首之劍搢為磊落壯大也

鞭韁

晉灼曰古長劍首以玉作井鞭韁形

請劍復仇

列子曰魏黑卵匿嫌殺丘邴章邴章之子來丹謀復父仇誓以手劍黑卵而黑卵力抗百人其視來丹猶雛鷺也來丹垂涕謀于友申抱申抱曰吾聞衛孔周其祖得殷之寶劍三僮子服之却三軍之衆奚不請為來丹適

衛見孔周執僕禮請先納妻子後言所欲周曰吾有三
劍唯子所擇一曰含光二曰承影三曰宵練此三寶傳
之十三世矣而無所施于事來丹請其下者孔周乃歸
其妻子跪而授其下劍丹再拜受之執劍從黑卵黑卵
醉偃卧牖下自頸至腰三斬黑卵黑卵醒怒其妻曰醉
而覆我使我益疾而腰急注云匿嫌私恨也無所施事
言不能害物也

投劍修行

晉載淵少好遊俠常在江湖劫掠時陸機赴洛輜重甚盛淵在岸上據胡牀指揮左右機于船上遙謂淵曰君才如此亦作劫耶非獨汚名亦玷宗戚淵遂涕泣投劍改過修行機珍重之便與定交

甲

管子曰葛盧之山發而出水金從之蚩尤受而制之以為劍鎧此其始也世本少康子與作甲說文首鎧謂之兜鍪亦曰胄臂鎧謂之釭頸鎧謂之鉏鍔唐六

典武庫令甲之制有十三一曰明光二曰光要三曰
細鱗四曰山文五曰烏鋌六曰白布七曰皐絹八曰
布背九曰步兵十曰皮甲十一曰木甲十二曰鏐子甲十三
曰馬甲明光光要細鱗山文烏鋌鏐子皆鐵甲也皮
甲以犀兕為之其餘皆因所用物名焉凡為甲必先
為容然後制革權其上旅與其下旅而重若一上旅
謂腰以上下旅謂腰以下

賀吳

吳越春秋勾踐使大夫文種于吳曰竊聞大王興大義
誅強救弱越使賤臣種以先人藏器及甲二十領以賀
君

獻魏

魏志景元二年肅慎國獻皮骨鐵雜鎗二十領

綴組

左襄三年楚子重伐吳至衡山使鄧廖帥組甲三百以
侵吳注云組甲以組綴甲也

襞紙

六帖徐商拜河中節度使置備征軍凡千人襞紙為鎧
勁矢不能入

吳犀

吳夫差有衣水犀之甲者三千人又楚人以鮫革犀兕
為甲

鄭兕

鹽鐵論強楚勁鄭有犀兕之甲

繕甲出田

詩鄭風叔于田刺莊公也叔處于京繕甲兵以出田國
人悅而歸之

衷甲候郊

唐王廷湊之亂詔李聽悉兵屯貝州史憲誠懼聽因取
道襲之衷甲候諸郊勅士橐兵野次魏人乃安

煮鎧為糧

漢耿恭守疏勒城煮鎧弩食其筋以為糧

覆鎧以笠

見將帥

子光伏甲

吳越春秋公子光伏甲士于私室具酒而請王僚王僚
乃被棠夷之甲三重使兵衛至光之門夾陛帶甲左右
皆王僚之左右也

叔孫幟甲

六帖叔孫氏之甲有幟注云幟識也

身不被甲

晉羊祜在軍輕裘緩帶身不被甲

家先藏甲

晉桓伊為江州刺史家先藏甲六百領預為表死乃上之詔褒納

蹲甲而射

見習射

被甲而臥

五代史劉詞暇日嘗被甲枕戈而卧謂人曰吾以此取富貴豈可一日忘之

季龍五色

陸剡鄴中記石季龍左右直衛萬人皆著五色細鎧光耀奪目

馬燧三制

唐馬燧造鎧必短長三制稱士所衣以便進趨

貢鎖子鎧

西域康居國開元初貢鎖子鎧

上金鬃鎧

唐高宗時百濟上金鬃鎧鎧士被以從帝與李勣會甲
光炫日

王琬夸衆

王世充兄子琬使於竇建德乘隋帝厩馬鎧甲華整出
入軍營以夸衆

德裕請人

李德裕請甲人於安定由是蜀人器械皆犀銳

被緋

北齊突至并州帝與宮人被緋甲登城以望軍營甚整

衣黑

楊行密有銳士五千衣以黑繒黑甲號黑雲都

旌旗

釋名旌精也言有精光也旗期也言與衆期於下也
周禮冬官司常掌九旗之名物以待國事日月為常

交龍為旂通帛為旃雜帛為物熊虎為旗鳥隼為旟
龜蛇為旐全羽為旄析羽為旌

五采

黃帝出軍決有所攻伐作五采牙幢青牙旗引住東赤
牙旗引住南白牙旗引住西黑牙旗引住北黃牙旗引
住中

九仞

廣雅天子之旌高九仞諸侯七仞大夫五仞士三仞天

子之旗九仞十二旒曳地諸侯七仞九旒齊軫卿大夫五仞七旒齊較士三仞五旒齊首是也

指敵

出軍決始立牙之日吉氣來應旌旗指敵是謂堂堂之陣正正之旗此大勝之徵也

警衆

禮曲禮前有水則載青旌注曰載所謂舉於旌首所以警衆者也

五法

河圖風后曰予告汝帝之五旗東方法青龍曰旗南方
法赤鳥曰鼠西方法白虎曰典北方法玄蛇曰旂中方
法黃龍曰常

九章

管子曰九章置則兵治士勇矣一曰舉日章則晝行二
曰舉月章則夜行三曰舉龍章則水行四曰舉虎章則
林行五曰舉鳥章則行坂六曰舉蛇章則行澤七曰舉

鵠章則行船八曰舉狼章則行山九曰舉犇章則載食而駕按章即旗也故禮曰以為旗章

四獸

曲禮行前朱鳥而後玄武左青龍而右白虎招搖在上急繕其怒注云行軍旅之出也招搖北斗七星也

五牛

周遷輿服志晉元皇始制五牛之旗設青在右黃在中

黃鳥

墨子曰赤鳥銜書降曰命周武王伐殷天賜以黃鳥之旗

翠鳳

李斯上書今陛下建翠鳳之旗樹靈鼉之鼓

鵠鶚

列子曰黃帝與炎帝戰以鵠鶚鷹鳶為旗幟蓋旌旗之始也

龍蛇

杜早朝詩旌旗日暖龍蛇動

紀功

周書厥有成績紀于太常太常王者之旗也畫日月之象有功者紀之於上

進善

漢文帝詔朝有進善之旌

尚赤

史記沛公祠黃帝蚩尤於沛庭旗幟皆尚赤

舉青

軍令聞擂鼓音舉白幡絲旗大小船皆進戰不進者斬
聞金音舉青旗船皆止不止者斬

鳥集

趙氏兵書有鳥集將軍旌上將軍增秩祿

虹垂

王沉餞行賦曳招搖之修旗若蜿蜒之垂天

麾三

唐李光弼執大旗曰望吾旗麾若緩可觀便宜若三麾至地諸軍畢入生死以之退者斬

益五

初壽州刺史高彥溫舉州降朱全忠楊行密襲之諸將憚城堅不可拔朱延壽鼓之拔其城即表為淮南節度副使全忠猶屯壽春延壽遣十旗擊西偏不勝將斬之李厚請益五旗殊死戰全忠引去

拂天

文選旌旗拂天

照日

唐馬璘從李光弼攻洛陽史朝義衆十萬屯北邙山旗
鎧照日

青龍

唐六典武庫令曰旗之制三十有二一曰青龍二曰白
獸三曰朱雀四曰玄武五曰黃龍六曰應龍七曰龍馬
八曰玉馬九曰鳳皇十曰鸞十一曰鷩十二曰太平

十三曰麒麟十四曰飛麟十五曰飛黃十六曰騏驎十七曰白澤十八曰五牛十九曰犀角二十曰金牛之類是也

白鵲

李白詩斬鯨血變黃河水梟首當懸白鵲旗

周七十里

唐嚴綬自河東司馬進司空在鎮九年嘗大閱旗幟周七十里

亘二百里

唐安祿山反召哥舒翰拜太子先鋒元帥天子命翰以行軍過門毋下旌旗亘二百里

蓋

蓋之為言覆也形圓象天橈二十八以象經星黃屋天子蓋也一曰繖一曰傘皆蓋之別稱

華蓋

見雲

曲蓋

風俗通武王伐紂大風折蓋遂為曲蓋

雨不假蓋

見友

暑不張蓋

後魏裴佗為將清白任真暑不張蓋寒不衣裘

不棄敝蓋

禮檀弓仲尼之畜狗死使子貢埋之曰吾聞之也敝帷不

棄為埋馬也敝蓋不棄為埋狗也丘也貧無蓋於其封也亦予之席毋使其首陷焉

令容高蓋

漢于公曰少高大吾門令容駟馬高蓋車

傾蓋而語

家語孔子之郟遭程子於塗傾蓋而語終日甚相親顧
擁蓋而歸

蘇秦後佩六國相印乘高車擁大蓋歸洛陽鄉里之人

奔走駭汗

如飛鶴

劉孝標廣絕交論難人始唱鶴蓋成陰注云謂蓋如飛鶴成陰言多也

若飛鴻

鮑明遠詩傾蓋若飛鴻

羽蓋

宋玉高唐賦曰翠為蓋兮注云以翠羽為蓋也

飛蓋

曹子建詩清夜遊西園飛蓋相追隨

山堂肆考卷一百七十九

欽定四庫全書

山堂肆考卷一百八十

明 彭大翼 撰

器用

舟

器物叢談舟船也水行用之以周流故曰舟以其循水而行故曰船船上施屋曰廬施重室曰飛廬又于其上施重屋曰雀室取其於中候望若鳥雀之驚視也總名曰船曰艘釋名上下重版曰艦外狹而長曰

艨艟二百斛曰舠三百斛曰艇

剡木為舟

易繫辭伏羲氏剡木為舟剡木為楫舟楫之利以濟不通蓋取諸渙呂氏春秋虞姁作舟世本共鼓貨狄黃帝二臣也始作舟

觀葉為舟

白帖古者觀落葉因以為舟淮南子曰古人見窾木浮而為舟

泛湖

見湖

行海

秦始皇好神仙有宛渠之民乘螺舟而至盖舟形似螺也沉行海底水不浸入

鷁首

淮南子曰龍舟鷁首注云鷁水鳥也畫其象著船首以禦水患

鴨頭

吳志太傅諸葛恪制為鴨頭船

解衣釋疑

陳平間行歸漢渡河船人見其美丈夫獨行疑其亡將
腰下當有寶器金玉目之欲殺平平心恐乃解衣裸而
佐刺船船人知其無有乃止

割錦示侈

吳甘寧輕俠每所過道路以繒錦維舟去則割棄之以

示奢侈

操舟若神

莊子顏回問仲尼曰吾嘗濟乎觴深之淵津人操舟若神吾問曰操舟可學耶曰可善遊者數能若乃夫沒人則未嘗見舟而便操之也

同舟若仙

東漢郭林宗遊洛陽始見河南尹李膺膺大奇之遂相友善於是名震京師後歸鄉曲衣冠諸儒送至河上車

數千兩林宗唯與李膺同舟而濟衆賓望之以為神仙
焉

子猷訪戴

見雪

庾翼引郭

晉郭翻字長翔乘小船歸武昌安西將軍庾翼以帝舅
之重躬往造翻欲強起之以其船狹小欲引就大船翻
曰使君不以鄙賤而辱臨之此固野人之船也翼俯屈

入其船中終日不去

刻舟求劍

呂氏春秋楚人有涉江者其劍自舟中墜於水遽刻其舟曰是吾劍所從墜也舟去從所刻處入水求之不亦惑乎

迴船受箭

魏略孫權乘大船來觀軍曹公使弓弩亂發箭著其船偏重將覆權因迴船復以一面受箭箭均船平乃還

烏江待羽

史記項羽敗欲東渡烏江烏江亭長艤舟以待注云整
船向岨曰艤

赤壁破曹

見將帥

立德征遼

唐閻立德即洪州造浮海大船五百艘遂以征遼

王濬伐吳

晉王濬為益州刺史謀伐吳造戰艦大船連舫方百二十步受二千餘人以木為城起樓櫓開四出門其上馳馬往來又畫鷁首怪獸於船首以懼江神舟楫之盛自古未有初晉將伐吳有童謠曰阿童復阿童銜刀浮渡江不畏崖上虎但畏水中龍既而王濬自益州造大船連舫順流而下遂建平吳之功阿童濬小字也

刺史船渡子胥

史記伍子胥與楚太子建之子勝俱奔吳到昭關人欲

執之胥與勝獨身步走追者在後江上有一漁父方刺船知胥之急乃渡之

飾舟逆叔向

說苑晉平公使叔向聘吳吳人飾舟以逆之左右各五百人有繡衣豹裘者錦衣狐裘者叔向歸以告平公曰吳其亡乎

齊山絕海

荆南成汭造巨艦一艘三年而成號曰和州載有齊山

絕海之名

浮家泛宅

唐顏真卿為湖州刺史隱士張志和來謁真卿以其舟
敝陋請更之志和曰願為浮家泛宅往來苕霅間

孝廉船

晉張憑字長宗舉孝廉同舉者笈之張詣丹陽尹劉惔
惔處之下坐王濛與惔言論有不通憑於末坐判之一
坐皆驚惔延之上坐留宿明旦還船同旅者問憑何處

宿憑笈而不答須更悞遣吏覓張孝廉船同載詣撫軍門即用為太常博士

書畫船

宋米芾喜畜書畫嘗發運江淮揭牌行舸曰米家書畫船

魯班木蘭

任昉述異記魯班嘗刻木蘭為舟詩家所云木蘭舟出於此

盧脩芙蓉

蕭方等三十國春秋盧脩富冠京邑芙蓉艦千餘艘

晉舶

李虔通俗文晉名舟曰舶

吳舫

張揖埤蒼舫吳船也又廣雅吳名舟曰舫

飛龍

晉宮閣記天泉池有紫宮舟升進舟曜陽舟飛龍舟射

獵舟靈芝池有鳴鶴舟指南舟舍利池有雲母舟無極
舟都亭池有華泉舟常安舟

翔鳳

西巡記宋孝武度六合自翔鳳舟以下三千四十五艘
舟航之盛三代二京無比

馳馬

崔豹古今注孫權名小船為馳馬

飛虎

中興繫年錄宋紹興二年王彥恢制飛虎戰艦傍設四輪每輪八楫日行千里

青雀

晉書陶侃擊蜀賊王真真釣得侃青雀船侃入小舫得脫

蒼隼

晉水戰有小兒先登船飛鳥船飛雲船蒼隼船

鸛鵒

輿服雜事遠國朝貢越海則有大船一名鸛鵒

鸛鵒

蜀王本記蜀王有鸛鵒舟

昆明水戰

漢武帝作昆明池以習水戰中有戈船樓船百艘上建樓櫓戈矛四角垂幡髦旌葆麾蓋照灼涯涘

魚藻水嬉

唐順宗為太子時侍德宗宴魚藻宮張水嬉綵艦宮人

為擢歌衆樂間發德宗懽甚顧太子曰今日何如太子
誦詩好樂無荒以對

艨艟拒敵

孫權討黃祖祖橫兩艨艟夾守沔口以拑擱大紂繫為
釘上有千人以弩交射飛矢雨下董襲凌統將敢死士
百人被兩鎧乘大舸突入蒙衝以刀斷兩紂艨艟乃橫
流大兵遂進追斬之

艨艟伏兵

呂蒙襲關公晝伏精兵舳舻中使白衣人搖櫓以進

烏榜紅舷

東坡詩城頭月落尚啼烏烏榜紅舷早滿湖按烏榜紅
舷湖船名

瓊舟瑤楫

抱朴子曰瓊舟瑤楫無涉川之用金弧玉弦無激矢之
能是以介潔而無政事者非撥亂之器儒雅而乏治略
者非翼亮之才

車

譙周古史考黃帝作車少昊時畧加牛禹時奚仲駕馬淮南子曰聖人觀轉蓬而為車器物發揮輅大車輅小車輜輕車輦挽車輶輶臥車輜重載衣物車兵車一也有輈車輈車輶車之別裘車一也有輈車輶車輈車之辨

象日月

周禮軫之方也以象地也蓋之圓也以象天也輪輻三

十以象日月也

法陰陽

東漢李尤小車銘圓蓋象天方輿法地輪法陰陽動不相離

以車記里

內傳黃帝遊幸天下以車記里又晉輿服志記里鼓車過江亡失制度而謝安率意造焉及獲京師舊輦形制無差唐元和中金忠義嘗作此車宋仁宗天聖五年內

侍盧道隆又造之其制獨轆雙輪廂上有兩層各安木人平執木槌車行一里下一層木人擊鼓上平輪轉一周車行十里上一層木人擊鐃一名大章車又元江西儒學提學楊鐵崖記里鼓車賦虛輪暈軫橫轆倚輓平廂層構低高間施木鐃象以正立手潛奮以有携列鼓鐃於上下各扣擊以司時

以車為營

漢書衛青伐匈奴以武剛車自環為營

中規中矩

周禮興人為車輪圓者中規方者中矩立者中縣衡者中水直者如生馬繼者如附焉注云如生如木從地生也如附如木之附也

有巾有蓋

孫吳兵法有巾有蓋謂之武剛車武剛者為先驅又為屬車後為殿焉

倚龍伏虎

董巴輿服志諸車之文乘輿倚龍伏虎靈文畫輶皇太子皇子諸侯倚虎伏鹿靈文畫輶公侯倚虎伏熊黑輶朱班輪又宋書漢制乘輿金根安車立車皆文獸伏軾龍首銜輶鸞雀立衡

輿輶賤輶

輿服志輶車古將軍車也一馬曰輶車二馬曰輶傳車漢輿輶輶而賤輶車晉重輶車而賤輶輶

挾輶以走

左隱十一年公孫闕與潁考叔爭車潁考叔挾輶以走子都拔棘以逐之注云輶車輶也

憑軾而觀

左僖二十八年楚子玉使鬬勃請戰於晉曰請與君之士戲君憑軾而觀之得臣與寓目焉注云得臣子玉名軾車前橫木也

遺孔子

孔叢子曰孔子使宰子于楚昭王以安車象飾遺孔子

宰子曰夫子無以為也夫子言不離道動不違仁妻不
服彩妾不衣帛車器不雕馬不食粟故臣知夫子之不
用此車也

迎申公

見求賢

叔敖化俗

史記楚民俗好庠車王以為庠車不便馬欲下令使高
之叔敖曰令數下民不知所從不可王必欲高車臣請

教閭里使高其梱乘車者皆君子君子不能數下車王
許之居半歲民悉自高其車注云庫下也梱門限也又
齊人好擊轂相犯以為樂禁之不止晏子為新車良馬
出與其人相犯曰擊轂者不祥下車去之然後國人不
為

子產濟人

孟子曰子產聽鄭國之政以其乘輿濟人於溱洧

伯玉過闕

衛靈公嘗與夫人南子夜坐聞車聲鱗鱗至闕而止過
闕復有聲夫人曰此必蘧伯玉也公曰何以知之夫人
曰君子不為昭昭伸節不為冥冥墮行吾聞蘧伯玉君
子也以是知之公問之果伯玉也

素忠到官

東漢素忠為沛相乘輦車到官以清節聞

千秋入殿

漢車千秋年老上優之朝見得乘小車入殿因號車千

秋魏鍾繇有膝疾拜起不便華歆亦以年高有疾朝見皆使載輿晉太始中上臨軒詔安平王孚載輿升殿司徒傅祗以足疾遜位不許令板輿上殿王導有羸疾不堪朝會令乘輿入殿不得施拜又唐房玄齡病稍間詔許肩輿入殿

敦復入朝

唐賈敦復入朝常盡室行車一乘弊甚人不知其為刺史也

車美可鑑

左襄二十八年齊慶封來奔獻車於季武子美澤可以鑑形也展莊叔見之曰車甚澤人必瘁宜其亡也

車新則安

說苑趙簡子好乘弊車癯馬衣殺羊之裘其宰諫曰車新則安馬肥則往來疾衣狐豹之裘則溫且輕簡子曰吾聞之君子服善則益恭細人服善則益倨今我以自備恐有細人之心也

不均茵憑

漢汲黯與周陽由同列共車未嘗敢均茵憑

常褰帷幔

梁曹景宗為領軍性躁動凡出行常欲褰車帷幔左右
諫以位望隆重不宜然景宗謂所親曰吾昔在鄉里騎
快馬如龍拓弓絃作霹靂聲箭如鵝鷄叫平澤中逐麋
數肘射之渴飲其血饑食其胃甜如甘露漿覺耳後生
風鼻頭出火使人忘死今來揚州作賢人路行開車幔

小人輒言不可閉置車中如三日新婦於邑使人氣盡
三過不觀

說苑晉平公為馳逐之車挂之以犀錯之以羽立於殿
下羣臣得觀焉田差三過而不觀平公大怒差曰桀以
奢亡紂以侈敗是以不敢觀也平公曰善乃去車

三反不受

說苑晏子朝乘弊車駕驂馬景公遺之輅車乘馬三反
不受曰夫輅車乘馬君乘之上臣亦乘之下民之無義

侈其衣食而不顧其行何以禁之卒不受

五色

應劭漢官儀天子有五色車皆駕四馬沈約宋書立車
五色安車亦如之皆天子之車也

七香

魏武帝與楊彪書今贈足下四望通幃七香車二乘青
犢牛二頭

引避廉頗

見同僚

不容荀勗

晉和嶠為中書令荀勗為監舊制監令同車嶠嫉勗諂
乃先登專坐不容荀勗勗乃自備車令監異車自此始

青牛

見仙

白鹿

葛洪神仙傳沈義學道於蜀中與其妻共載道逢白鹿

車一乘

靖室

漢朝輿駕祠甘泉汾陰備千乘萬騎太僕執轡大將軍
陪乘名為大駕有司馬車駕四中道辟惡車駕四中道
記道車駕四中道靖室車駕四中道

充庭

漢安帝記永初四年正月元會徹樂不陳充庭車注云
每大朝會必陳乘輿法物車輦於庭故曰充庭車也以

年饑故不陳

趙談駟乘

漢文帝出趙談駟乘素盞伏車前曰臣聞天子所以共六尺輿者皆天下豪英今漢雖乏人奈何與刀鋸之餘共載於是上笑下趙談談泣而下車一說作趙同

趙溫同輿

東漢侍中趙溫字子柔獻帝自西都與溫同輿輦至長安封江南侯為司空

登車致命

左宣十五年公孫歸父會楚子於宋宋人使樂嬰齊告
急於晉晉景公欲救之使解揚如宋使無降楚曰晉師
悉起將至矣鄭人囚解揚獻諸楚楚子使反其言登諸
樓車使呼宋人而告之遂致其君命注云樓車車上望
櫓登諸樓車言晉登解揚於樓車也遂致其命言解揚
既見宋人遂以晉人悉師將至之命致之也

登車望軍

左成十六年晉厲公伐鄭楚子登巢車以望晉軍注云
兵車高如巢可以望敵故楚共王登以望晉軍之動息
附蜂

漢書豫章嚴豐字孟卿為郡主簿太守賈萌舉兵欲誅
王莽有飛蜂附萌車衡豐諫以為不祥萌不從果見害
拒馬

宋紹興二年王彥恢制神武戰車下安四輪略同飛虎
頂帳布帷以避矢石傍斜衝擊其用如神又有拒馬車

一人之力可以轉用比之蒙衝偏廂鹿角尤為至要

碧玉輦

王子年拾遺記周穆王馭黃金碧玉之輦從朝及暮而窮宇宙之內徧焉

黃金輿

唐黃巢乘黃金輿衛者皆繡袍華幘陷京師入自春明門

玳瑁廂

周遷輿服雜事五輅兩廂之後皆用玳瑁鵠翅注云鵠大鳥名其羽纖利故車箱象也

茱萸輶

晉石崇奴券曰作車大良白槐之幅茱萸之輶注云車轆曰輶

重牙

董巴輿服志乘輿金根車五乘輪皆朱斑重牙貳轂

兩尾

張揖坤蒼輜車轅兩尾

三寸轄

淮南子曰夫車所能轉千里者以其要在三寸轄

四寸鍵

尸子曰文軒六馭無四寸之鍵則車不行小忘則大不成也

金輅載歸

唐太宗命裴寂與長孫無忌升金輅寂辭帝曰公有佐

命勲無忌宣力王室非二人誰可驂乘者遂同載歸
寶輿迎入

六帖唐嚴武為漢州刺史吐蕃引雜羌寇山西武遣崔
寧將而西既薄賊城城皆累石不得攻諜知惟東西不
合者丈許乃為地道再宿而拔拓地數百里虜驚相謂
曰寧神兵也及還武大悅裝七寶輿迎入成都以誇於
軍

為設腰輿

唐褚無量復故官以耆老隨杖聽徐行又為設腰輿許乘入殿中

特賜步輿

唐李綱以足疾賜步輿聽乘至閣又崔祐甫被疾詔肩輿至中書臥而承旨

引車毀堞

唐侯君集討高昌鼓而前賊嬰城自守遣諭之不下乃刊木塞塹引撞車毀其堞飛石如雨所向無敢當者因

拔其城

以車繚營

唐房琯討賊用春秋時戰法以車二千乘繚營騎步夾之遂戰敗

豹尾

鹵簿令黃鉞車左武衛隊正一人在車執弓箭豹尾車右武衛隊正一人在車執弓箭

鹿角

晉馬隆討羌依八陣圖作偏廂車地廣為鹿角車營路狹則為木屋施於車上且戰且前弓矢所及應弦而倒

圓外方中

唐柳宗元說車楊誨之將行柳子起而送之門有車過焉指而告之曰若知是之所以任重而行於世乎材良而器攻圓其外而方其中也材而不良則速壞工之為功也不攻則速敗中不方則不能以載外不圓則窒拒而滯方之所謂者箱也圓之所謂者輪也匪箱不居匪

輪不塗吾子其務法焉者乎

固狹擅高

司馬溫公飯車說天雨迂夫出見飯車息於高蹊者指謂其徒曰是車也將覆不久矣行未十步聞譟聲顧見其車已覆其徒謂曰子何用知之迂夫曰吾以人事知之夫天雨道濘而蹊獨不濡又狹而高是衆人之所趣也而車不量其力固狹擅高久留不去以妨衆人之欲進者其能無覆乎禍有鉅於此者奚飯車之足云

馬不能上

戰國策汙明見春申君曰驥之齒至矣服鹽車上太行
中阪遷延負轅不能上伯樂遭之下車攀而哭之解紵
衣而幕之於是俯而噴仰而鳴聲達於天欣伯樂之知
已也

牛不能引

明皇雜錄上將幸華清宮畧妃姊妹競飾車服各為一
犢車展以金翠間以珠玉一車之費不啻數十萬既載

甚重而牛不能引

阮裕焚車

晉阮光祿在剡曾有好車借者無不給之有人塋母意欲借而不敢言阮後聞之嘆曰吾有車而使人不敢借何以車為遂焚之按光祿名裕字思曠以德業知名

孟郊借車

唐孟郊借車詩曰借車載家具家具少於車借者莫彈指貧窮何足嗟百年徒校走萬事盡隨花

屬車十乘

孔帖天子屬車十乘一曰指南車二曰記里鼓車三曰白鷺車四曰鸞旗車五曰辟惡車六曰皮軒車七曰羊車八曰耕根車九曰四望車十曰安車為十乘行幸陳於鹵簿則分前後大朝會則分左右皇后之車六重翟車獻翟車安車翟車四望車金根車也皇太子之車三金輅輅車四望車也親王及武職一品有象輅二品三品有革輅四品有木輅五品有輅車

畫車百乘

孔帖帝問游幸之費對曰聞懿宗以來每行幸無慮用錢十萬金帛五車十部樂工五百犢車紅輜朱輜畫香車百乘諸衛士三千

鞍

說文鞍馬鞞具也

賜趙燾

漢書光武徵趙燾引見賜鞍馬待詔公車

賜桓郁

東觀漢記永元元年西謁園林桓郁兼羽林中郎將上
賜馬二疋并鞍勒防汗

下馬解鞍

見將帥

上馬墮鞍

吳孫權欲使嚴峻鎮京口峻辭因試峻峻上馬墮鞍乃
聽之人嘉其實讓

琉璃

西京雜記武帝時身毒國獻白光琉璃鞍在暗中光照
十丈

玫瑰

雜記漢武得貳師天馬造玫瑰石為鞍又古詩金羈玳
瑁鞍

翠飾

鹽鐵論古者繩鞞草鞞皮薦而已其後代以革鞍鐵鑣

而為飾又其後有金銀翠毛之飾又有障泥障汗鞞尾亦從鞍以為飾

紫茸

魏百官各有紫茸題頭高橋鞍一具

馬援據鞍

見將帥

毛寶踢鞍

晉毛寶以救桓宣帝中箭貫髀徹鞍使人踢鞍拔箭血

流滿靴

懸柱

魏志太祖馬鞍懸于庫柱為鼠所嚙吏懼死鄧哀王冲以刀故穿單衣如鼠嚙者謬為愁色太祖問之冲曰俗以鼠嚙衣者為不吉太祖曰此妄言耳俄而庫吏以嚙鞍聞太祖笑曰兒衣在側而嚙况鞍懸柱乎遂不罪之

挂林

謝惠連詩挂鞍長林側飲馬修竹湄又劉琨扶風歌繫

馬長松下登鞍高岳頭

鏤衢鞍

三輔決錄平陵公孫奮富聞京師梁冀知其儉恠以鏤
衢鞍遺奮從貸五十萬

金梁鞍

南宋劉義恭謝金梁鞍啓賜臣供御金梁橋鞍制作精
巧宜副龍馭聖慈下逮猥垂光錫

寧王玉鞍

天寶遺事寧王有煖玉鞍每至冬月則用之雖天氣嚴寒而坐于鞍上如溫火之氣又明皇在蜀以七寶鞍賜張后李泌請分賜將士

行儉珍鞍

唐裴行儉有賜及珍鞍令史私馳馬馬蹶鞍壞不加罪

轡

釋文轡拂也言牽引拂戾以制馬也轡之為飾有銜勒鑣羈韁鞚之類銜銜在口中之義勒絡也絡其頭

而引之鑣包也在旁包斂其口也羈檢也所以持制之也韁疆也繫之使不得出疆限也韁亦曰勒韁者控制之義

如絲

詩小雅我馬維騏六轡如絲如絲調忍也

如組

詩邶風簡兮有力如虎執轡如組組織絲為之也

挈轡令舍

夏官挈壺氏掌挈壺以令軍井挈轡以令舍挈畚以令糧注云軍之所聚不可無井穿井及水則舉壺以示人乘車者必執轡止則解焉故舍止則舉轡以示人盛糧者必用畚當廩給則舉畚以示人令舍謂懸轡於所當止之處也

受轡犯軼

夏官大馭掌馭王路以祀及犯軼王自左馭馭下祀登受轡犯軼遂驅之

太僕執轡

百官春秋

都尉執轡

漢光武東京郊祀法駕則河南尹奉引奉車都尉執轡
侍中駟乘

千乘弭轡

班固東巡頌乘輿動色羣后屏氣萬騎齊鑣千乘弭轡

百馬齊轡

魏明帝善哉行百馬齊轡御由造父

人君執轡

家語閔子騫為費宰問政於孔子孔子曰君者人也吏者轡也刑者策也人君之政執其轡策而已矣

人臣銜轡

淮南子曰權衡者人主之車輿爵祿者人臣之銜轡

鞭

說文鞭所以驅馳者也或謂之策

贈策送士會

見餞別

杖策追蕭王

鄧禹杖策追蕭王秀及于鄴

請鞭獲奴

見卜筮

示鞭留騎

見亭

石慶數馬

漢石慶為太僕御出上問車中幾馬慶以策數之舉手曰六馬

武后馭馬

唐武后朝吉頊獲罪后怒曰昔太宗有馬肥逸難馭朕時為宮女進言曰妾能制之然須三物一鐵鞭二鐵撾三七首鞭之不服則撾其首撾之不服則斷其喉太宗壯朕之志今頊豈足污朕之七首耶貶為安固尉

執鞭啟事

吳孫策將呂範言于策曰今將軍事業日大士衆日盛而紀綱猶有不整者範願暫領都督佐將軍部分之策曰子衡既為士大夫宜宜復屈小職知軍中細事乎範曰不然範今捨本土而托將軍者非為妻子也欲濟世務也譬猶同舟涉海一事不牢即俱受其敗此亦範計非但將軍也策笑範出便釋構著袴褶執鞭詣闕下啟事自稱領都督自是軍中肅睦威令大行

留鞭止行

見太守

著鞭度橋

三國孫權攻合肥曹操使張遼拒之遼夜募敢死之士
明旦陷陣衝壘入至麾下權大驚走撤軍還至逍遙津
北遼將步騎奄至甘寧呂蒙力戰扞敵凌統率親近扶
權出圍乘駿馬上津橋橋南已撤丈餘無版有親近谷
利使權持鞍緩控于後著鞭遂得超度

以鞭笞數

唐劉宴總糧儲每朝會馬上以鞭笞數

宋興拂瘠

晉惠帝時成都王穎殺東安王繇琅琊王睿從帝在鄴
恐禍及將逃歸穎先勅關津毋得出貴人睿至河陽為
津吏所止從者宋興自後來以鞭拂睿而笞曰舍長官
禁費人汝亦被拘耶吏乃聽過至洛陽迎大妃夏侯氏
俱歸國

李穆扶泰

魏宇文泰與東魏戰馬驚逸墜地東魏兵追及之左右
皆散李穆以策扶泰之背曰籠東軍士汝曹主何在而
尚留此追者不疑穆因以馬授泰與俱逸

鞭揮公主

見元宵

鞭授賁妃

唐楊貴妃方有寵每乘馬則高力士執轡授鞭

祖逖著鞭

晉劉琨與祖逖齊名及逖被用琨謂人曰吾枕戈待旦
常恐祖生先我著鞭

克用射鞭

後唐李可舉討李克用大破之克用亡走達靼時與其
豪帥遊獵置馬鞭或木葉或懸針射之無不中豪帥大
服

建封賜鞭

見節使

桓玄指鞭

桓玄戰敗將出奔胡或謂之曰今羽林射手尚存八百
捨此而去可復得乎玄直以馬鞭指天而已

投鞭斷流

秦王苻堅謀伐晉石越曰彼據長江之險民為之用殆
未可伐也堅曰以吾之衆投鞭於江可斷其流何險之
足恃乎

視鞭涉水

金主旻伐遼次混同江無舟以渡金主使一人導前乘赭白馬徑涉曰視吾鞭所指而行諸軍隨之水及馬腹既濟使舟人策其渡處不得其底

